

每週經課朗誦經文(巴克禮漢羅/教羅)2012/10/28

共同經課 - 1 約伯記四十二章一節~六節、十節~十七節

1 約伯應耶和華講，2 我知你萬事 lóng 能，你 ê 旨意 lóng boē 阻擋得。3 Chit-ê 無知來蓋密所議論 ê，是 chī-chūi ah？所以我有講出我所無明 ê，就是我所想 boē 出 ê 奇妙，我所 m̄ 知。4 求你聽，我 beh 講，我問你，你應我。5 我前耳孔聽見你，taⁿ 我 ê 目矚看見你；6 所以我家已厭惡，tī 塵埃 kap 火灰 ê 中間反悔。10 約伯替伊 ê 朋友祈禱 ê 時，耶和華就 hō伊 ê 景況復原；koh 耶和華賞賜約伯比以前所有 ê 加倍。11 Hit 時伊 ê 眾兄弟、姊妹，kap 以前相識 ê 人 lóng 來見伊，tī 伊 ê 厝相 kap 食，為 tiòh 耶和華所降落 tī 伊一切 ê 災厄，lóng 悲傷來安慰伊；tāk 人送伊一塊銀，tāk 人送伊一個金環。12 An-ni 耶和華賜福約伯 ê 尾景贏過伊 ê 起頭；伊有羊一萬四千，駱駝六千，牛一千對，驢母一千。13 伊也有七個 kiáⁿ，三個 cha-bó-kiáⁿ。14 伊 kā 大 cha-bó-kiáⁿ 名叫 lâ-bí-má，第二個名叫 Ki-sé-a，第三個名叫 Ki-liân-hap-phok。15 Thong hit 所在 ê 婦女，chhē 無親像約伯 ê cha-bó-kiáⁿ hiah-nih súi；in ê 老父 hō in tī 兄弟中得 tiòh 產業。16 Chit-tiàp 以後，約伯 koh 食一百四十歲，得 tiòh 看見伊 ê kiáⁿ，伊 ê 孫，到四代。17 An-ni 約伯年歲老，日子滿，就死。

共同經課 - 2 詩篇三十四篇一節~八節、十九節~二十二節

1 大衛 ê 詩；就是伊 tī A-pì-bí-lèk ê 面前假瘋癲，受趕出去 ê 時所做 ê。1) 我 beh 時時 o-ló 耶和華；O-ló 伊 ê 話 beh 常常 tī 我 ê 嘴。2 我 ê 心神 beh 因為耶和華來誇口；謙卑 ê 人聽見，亦 beh 歡喜。3 Lín kap 我 tiòh o-ló 耶和華做大，相 kap chun 伊 ê 名做高。4 我 bat 求耶和華，伊就應我；救我脫離我一切 thang 驚 ê 事。5 In kiáh 頭看伊，就得 tiòh 光明；In ê 面永 boē 見笑。6 Chit-ê 困苦 ê 人求叫，耶和華聽見；救伊脫離伊一切 ê 患難。7 耶和華 ê 使者 tī 敬畏伊 ê 人 ê 四圍紮營，來拯救 in。8 Lín tiòh 試看，就知耶和華是好；Oá 靠伊 ê 人有福氣。19 義人有 choē-choē 苦難，總是耶和華救伊 lóng 脫離。20 保全伊 lóng 總 ê 骨；一支亦無 phah 折。21 罪惡 beh 害死 pháiⁿ 人；怨恨義人 ê beh 受定罪。22 耶和華救贖伊 ê 奴僕 ê 神魂；凡若 oá 靠伊 ê，無一個受定罪。

共同經課- 3 希伯來書七章二十三節~二十八節

23 Hiah-ê 做祭司 ê，因為 hō死阻隔，boē 會久長，所以 tiòh 真 choē 人；24 獨獨 chit-ê，因為永永 tī-teh，有 boē 改換 ê 祭司職。25 所以凡若 tùi 伊就近上帝 ê 人，伊能救 in 到完全，因為伊長長活，來替 in 祈求。26 因為 chit 號 ê 祭司頭合咱 ê 欠用；伊是聖，無 pháiⁿ，無 lâ-sâm，離開罪人，成做 khah 高 chiah-ê 天；27 伊 m̄ 免親像 hiah-ê 祭司頭，tiòh 日日事先為 tiòh 家己 ê 罪，後來為 tiòh 百姓 ê 罪，來獻祭；因為伊獻本身，就做一下成 chit-ê 事。28 因為律法設立軟 chiáⁿ ê 人做祭司頭；獨獨律法後 chiù-choā ê 話設立 Kiáⁿ，永遠做完全 ê 祭司頭。

共同經課 - 4 馬可福音十章四十六節~五十二節

46 In 到耶利哥；耶穌 kap 伊 ê 學生 kap 大陣人出耶利哥 ê 時，有 Tí-mái ê Kiáⁿ，巴底買，就是 chhiⁿ-mí 做乞食 ê，坐 tī 路邊；47 已經聽見是拿撒勒人耶穌，就喉叫講，大衛 ê 後裔，耶穌，可憐我。48 Choē-choē 人責備伊，kah 伊靜靜；但是伊益發大聲喉叫講，大衛 ê 後裔 ah，可憐我。49 耶穌停腳講，叫伊來。就叫 chhiⁿ-mí 人，kā 伊講，安你 ê 心，起來，伊 teh 叫你 ah。50 伊就放 sak 伊 ê 衫，跳起來去就近耶穌。51 耶穌應伊講，Ài 我 kā 你做甚麼？Chhiⁿ-mí 人 kā 伊講，Liáp-pho-ní，我 ài 得 tiòh 看見。52 耶穌 kā 伊講，去 ah，你 ê 信有救你 lah。伊 liám-piⁿ 得 tiòh 看見，就 tī 路裡 tè 耶穌。